

0.0.1 ekapuggalasuttaṃ

1. ekaṃ samayaṃ bhagavā rājagahe viharati gijjhakūṭe pabbate. tatra kho bhagavā bhikkhū āmantesi bhikkhavo'ti. bhadante'ti te bhikkhū bhagavato pac-cassosum, bhagavā etadavoca:

2. anamataggoyaṃ bhikkhave, saṃsāro pubbā koṭi na paññāyati avijjānīvaraṇānaṃ sattānaṃ taṇhāsaṃyojanānaṃ sandhāvatāṃ saṃsarataṃ. ekapuggalassa bhikkhave, kappāṃ sandhāvato saṃsarato siyā evaṃ mahā aṭṭhikaṅkhalo aṭṭhipuñño aṭṭhirāsi yathāyaṃ vepullo pabbato, sace saṃhārako assa, sambhatañca na vinasseyya. taṃ kissa hetu? anamataggoyaṃ bhikkhave, saṃsāro. pubbā koṭi na paññāyati avijjānīvaraṇānaṃ sattānaṃ taṇhāsaṃyojanānaṃ sandhāvatāṃ saṃsarataṃ. yāvañcidaṃ bhikkhave, alameva sabbasaṅkhāresu nibbinditum, alaṃ virajjitum, alaṃ vimuccitunti.

3. idamavoca bhagavā. idaṃ vatvā sugato athāparaṃ etadavoca satthā:

ekassekena kappena,
puggalassaṭṭhisaṅcayo;
siyā pabbatasamo rāsi,
iti vuttaṃ mahesinā

so kho panāyaṃ akkhāto,
vepullo pabbato mahā;

uttaro gijjhakūṭassa,
magadhānaṃ giribbaje.

yato ca¹ ariyasaccāni,
sammappaññāya passati:
dukkhaṃ dukkhasamuppādaṃ,
dukkhassa ca atikkamaṃ;
ariyañcaṭṭhaṅgikaṃ maggaṃ,
dukkhūpasamagāminaṃ.

na sattakkhattu paramaṃ,
sandhāvitvāna puggalo;
dukkhassantakaro hoti,
sabbasaññojanakkhayā'ti.

¹yato - simu. pts.
pts page 186